

POTENSI PENERIMAAN DAN PENOLAKAN PELAJAR IPT TERHADAP KUMPULAN *THE ISLAMIC STATE OF IRAQ AND SYRIA* (ISIS) DI SEMENANJUNG MALAYSIA³

Che Mohd Aziz Yaacob, Bakri Mat, Fakhrorazi Ahmad, Mohd Azizuddin Mohd Sani, Rusdi Omar & Kamarul Zaman Hj. Yusoff

239

PROSEDUR SEMINAR PENELITIAN
MAREK 2016

Ancaman kumpulan pengganas The Islamic State of Iraq and Syria (ISIS) atau lebih dikenali sebagai Islamic State (IS) kini menjadi isu yang tidak asing lagi sama ada di peringkat domestik, mahupun global. Dalam konteks perbincangan akademik, bidang pengajian Hubungan Antarabangsa mengkategorikan ancaman dari kumpulan aktor bukan negara (non-state actor) sebagai ancaman bukan tradisional terhadap keselamatan negara. Dalam konteks semasa, pergolakan politik dunia khususnya di rantau Timur Tengah telah memberi ruang kepada kumpulan ISIS untuk berkembang dan menular sehingga mengakibatkan keselamatan Malaysia turut terjejas.

Dalam konteks Malaysia, keterlibatan rakyat Malaysia dalam kumpulan ISIS adalah membimbangkan. Rakyat negara ini pernah digemparkan dengan serangan bom berani mati oleh Ahmad Tarmimi Maliki (26 tahun) di ibu pejabat SWAT Iraq di al-Anbar dan satu insiden serangan di Homs, Syria oleh Ahmad Affendi Manaff (27 tahun) (Farik Zolkepli, 2014). Dalam satu peristiwa lain, Datuk Ayub Khan Mydin Pitchay, Ketua Penolong Pengarah Kaunter Terrorism, Cawangan Khas Bukit Aman turut mengesahkan bahawa rakaman video yang berdurasi selama 30 saat yang memaparkan penyembelihan warga Syria yang dipercayai pengintip tentera Bashar al Assad telah dilakukan oleh Mohd Faris Anuar, seorang remaja berusia 20 tahun yang berasal dari Gurun, Kedah. Dalam rakaman video tersebut, seorang lagi rakyat Malaysia iaitu Muhammad Wanndy Mohamad Jedi, berusia 25 tahun yang berasal dari Durian Tunggal, Melaka turut bergambar dengan seorang lelaki Arab yang mengangkat kepala mayat lelaki yang disembelih tersebut (Datuk Ayub Khan, 28 September 2015, Temubual ; Azrai, 2015). Sejurus itu, Malaysia sekali lagi digemparkan dengan penahanan remaja perempuan berumur 14 tahun di Lapangan Terbang Antarabangsa Kuala Lumpur (KLIA) yang berasal dari Muar, Johor untuk ke Mesir dan seterusnya ke Syria bagi tujuan menyertai ISIS. Manakala kes lain antaranya pihak polis menahan seorang suri rumah yang bertindak menghasut dan mempengaruhi beberapa wanita lain untuk berjuang menyertai ISIS di Syria dan Iraq (Temubual Dato Ayub Khan, 28 September 2015). Baru-baru ini, Ketua Polis Negara, Tan Sri Khalid Abu Bakar turut mengesahkan kejadian serangan bom ke atas sebuah bar, *Movida Kitchen, Bar and Club Lounge* di IOI Boulevard di Puchong pada 28 Jun 2016 turut membabitkan elemen kumpulan pengganas militan ISIS dan kesemua individu berusia 19 hingga 52 tahun yang ditangkap sedang disiasat di bawah Akta Kesalahan Keselamatan (Langkah-langkah Khas) 2012 atau lebih dikenali SOSMA (Muhammad Afham Ramli, 2016). Sehingga bulan

³ Kertas kerja ini disediakan untuk pembentangan Seminar Penyelidikan IYRES 2016 pada 9-10 Ogos 2016, adalah merupakan versi terkini yang diupdate daripada artikel asal yang telah dihantar untuk penerbitan dalam Jurnal keluaran IYRES sebagai sebahagian daripada syarat penerimaan projek penyelidikan.

Mac 2016, menurut Pengarah Cawangan Khas Bukit Aman, Datuk Seri Mohamad Fuzi Harun, terdapat seramai 47 orang rakyat Malaysia dikesan berada di Syria dan Iraq terlibat dengan kumpulan militan ISIS. Daripada jumlah berkenaan, 30 daripadanya adalah lelaki, sembilan wanita dan lapan kanak-kanak. Kesemua mereka merupakan antara 72 individu yang terlibat dengan ISIS sebelum ini (The Malay Mail, 5 Mac 2016).

Rentetan daripada kejadian ini menyebabkan kerajaan memandang serius terhadap ancaman ISIS. Perdana Menteri Malaysia, Yang Amat Berhormat Dato' Seri Mohd Najib Tun Abdul Razak telah membentangkan Kertas Putih⁴ di Parlimen sebagai satu usaha serius untuk menghapuskan ancaman kumpulan pengganas ini. Melalui pembentangan Kertas Putih ini kerajaan Malaysia mengemukakan usul bagi mendapatkan sokongan semua pihak dalam usaha untuk mencegah dan menentang anasir ISIS di Malaysia (Jabatan Perdana Menteri, 2015). Dalam ucapannya di Parlimen, Perdana Menteri menyatakan kebimbangan terhadap potensi menjadi ancaman kepada negara khususnya kepulauan rakyat Malaysia dari kawasan konflik di Syria dan Iraq akan meningkatkan risiko keselamatan negara. Mereka yang dilengkapi dengan pengalaman, kemahiran, taktik peperangan dan lain-lain lagi berupaya melakukan aktiviti keganasan secara sendiri. Di samping itu, wujudnya sel-sel pengganas dan membentuk jaringan dengan kumpulan militan sedia ada dalam negara atau serantau. Beliau turut mencadangkan satu undang-undang baru digubal bagi menangani, membanteras dan mengambil tindakan terhadap rakyat Malaysia yang terlibat dalam aktiviti militan dan kumpulan pengganas.

Justeru, dalam menghadapi ancaman pengaruh ISIS ini, pihak kerajaan menggunakan pendekatan pencegahan, pengawalan dan penyelesaian atau transformasi sebagai pendekatan utama. Pelaksanaan kaedah pencegahan (di awal kejadian), pengawalan (semasa kejadian) dan transformasi sebagai penyelesaian masa depan. Oleh yang demikian, penyelidikan yang dijalankan ini adalah sebagai usaha untuk membantu pihak kerajaan menangani ancaman ISIS dan sebagai panduan dalam membentuk polisi penyelesaian pada masa depan. Kajian yang berjaya dijalankan ini memfokuskan kepada kefahaman dan potensi penolakan atau penerima ideologi ISIS dalam kalangan belia yang terdiri daripada pelajar Institut Pengajian Tinggi (IPT). Pelajar IPT yang bakal mewarisi kepimpinan negara pada masa depan sangat penting untuk difahami bagi membentuk generasi akan datang. Oleh yang demikian, pendekatan pencegahan adalah penting dalam memantau dan menyekat pengaruh ISIS dalam kalangan pelajar universiti. Mereka yang sentiasa terdedah dengan maklumat global untuk tujuan pengajian berkemungkinan turut mengikuti perkembangan konflik di Syria dan Iraq di media sosial. Justeru, fokus kajian ini adalah melihat kepada tahap penerimaan dan penolakan pendekatan ekstrem ISIS dalam kalangan pelajar IPT di semenanjung Malaysia.

METODOLOGI

Kajian ini dijalankan dengan menggunakan kaedah kuantitatif, secara *survey* berdasarkan borang soal selidik. Di dalam pembentukan soalan dalam borang soal selidik untuk proses pengutipan data, penyelidik juga menjalankan kaedah perbincangan kumpulan berfokus dan juga temubual mendalam. Tujuan kedua-ke dua kaedah ini dijalankan adalah untuk mendapatkan maklumat penting yang akan digunakan di dalam borang soal selidik.

Memandangkan tempoh masa yang agak terhad, penyelidik menggunakan teknik kajian rentas atau *cross-sectional study*. Teknik ini adalah yang paling sesuai untuk tujuan pengutipan data. Kajian ini mengaplikasikan teknik kajian keratan rentas yang memerlukan penyelidik untuk mengumpul data hanya sekali dalam apa-apa sampel yang dipilih daripada populasi kajian (Zikmund, 2003).

⁴ Kertas Putih tersebut antara lain menjelaskan bahawa kerajaan menyedari bahaya pengaruh ISIS ini yang boleh mengancam keselamatan negara dan memerlukan kerjasama dengan pihak pelbagai pihak termasuk Pertubuhan Bangsa-bangsa Bersatu dalam merangka strategi dan dasar bagi menanganinya. Kertas Putih yang bertajuk 'Ke Arah Menangani Ancaman Kumpulan Islamic State' ini menggariskan beberapa perkara sebagai penjelasan dan tindakan yang akan diambil oleh kerajaan Malaysia. Antaranya, Malaysia bertanggungjawab untuk mendedah atau menjelaskan bahaya fahaman ekstrem IS adalah bertentangan dengan ajaran Islam sebenar dan Perlembagaan Malaysia. Oleh itu, kerajaan Malaysia akan mempertingkatkan usaha untuk menjelaskan konsep Jihad yang sebenar serta memperbetulkan persepsi Barat yang kerap mengaitkan Islam dengan keganasan.

Bagi kajian ini, satu *sampling frame* lengkap tidak berjaya diperoleh memandangkan senarai nama pelajar bagi setiap IPTA di Malaysia adalah maklumat sulit. Situasi ini menyebabkan pensampelan secara rawak tidak dapat dijalankan akibat ketiadaan satu senarai lengkap kerangka pensampelan (*sampling frame*). Oleh kerana kekangan tersebut, teknik pensampelan yang digunakan dalam kajian ini adalah pensampelan pertimbangan (*judgmental sampling*). Pensampelan pertimbangan melibatkan pilihan responden yang berada dalam kedudukan yang terbaik untuk menyediakan maklumat yang diperlukan (Sekaran, 2000). Kaedah pensampelan adalah sesuai kerana sampel kajian ini memerlukan sifat-sifat tertentu dilampirkan kepadanya dalam rangka untuk memastikan tafsiran data adalah bermakna. Dalam proses menentukan sifat-sifat khusus yang akan dikenakan pada sampel, penyelidik membuat pertimbangan berasaskan tujuan dan konteks kajian. Apa-apa unsur yang besar yang boleh diguna pakai dalam menjawab persoalan kajian dengan tepat dianggap satu ciri yang penting yang pengkaji perlu lihat.

Berdasarkan objektif dan persoalan kajian ini, sifat yang digariskan untuk melayakkan responden menjadi sampel kajian adalah pelajar IPTA dan berstatus belia. Pensampelan pula dibuat mengikut kawasan iaitu zon utara (Kedah, Perlis, dan Perak), zon tengah (Selangor dan Kuala Lumpur), zon pantai timur (Kelantan dan Terengganu), dan zon selatan (Melaka, Negeri Sembilan, dan Johor). Setiap zon diperuntukkan 300 soalan soal selidik untuk diedarkan. Beberapa universiti awam di zon berkenaan akan di sampel. Ini menjadikan keseluruhan soal selidik yang diedarkan kepada pelajar IPT yang berstatus belia adalah sebanyak 1200 soal selidik.

Untuk kajian ini, unit analisis yang sesuai adalah unit individu. Secara khusus, unit analisis tersebut adalah pelajar universiti awam dan swasta di Semenanjung Malaysia. Satu lagi justifikasi penting mengapa individu digunakan sebagai unit analisis bagi kajian ini adalah disebabkan oleh hakikat bahawa kajian memerlukan pemahaman tingkah laku manusia di dalam konteks yang khusus. Mengkaji tingkah laku manusia memerlukan penyelidik untuk mengkaji orang dari tetapan persekitaran yang berbeza dan kumpulan-kumpulan sosial (Babbie, 2001). Ini membantu penyelidik untuk membuat generalisasi tentang populasi kajian.

Dalam kajian ini, soal selidik yang digunakan adalah satu set soalan yang telah dibangunkan berasaskan kepada temubual dan *focus group discussion*. Soalan yang dibangunkan ini kemudiannya dilakukan pengujian beberapa kali sebelum diedarkan kepada para responden. Secara umum, soal selidik ini dipecahkan kepada beberapa segmen yang merangkumi Seksyen A, Seksyen B, dan Seksyen C. Seksyen A adalah berkenaan dengan data demografi responden. Seterusnya Seksyen B adalah data berkenaan dengan pengetahuan responden tentang ISIS. Manakala Seksyen C pula adalah soalan-soalan instrumen kajian yang berkisar tentang beberapa pemboleh ubah utama kajian. Secara terperinci, pengagihan soalan borang soal selidik adalah seperti di bawah.

Jadual 1: Susunan Soalan Soal Selidik mengikut Dimensi Kajian

| Dimensi/klasifikasi | Jumlah Soalan |
|----------------------------------|----------------------|
| Demografi | 9 butiran |
| Pemahaman pelajar berkenaan ISIS | 7 item |
| Penerimaan terhadap ISIS | 8 item |
| Total | 24 item |

DAPATAN KAJIAN

Responden kajian adalah dipilih dari institusi pengajian tinggi awam dan swasta di Semenanjung Malaysia yang telah dipecahkan kepada empat zon iaitu Utara, Tengah, Selatan dan Pantai Timur. Jadual 1 menunjukkan responden berselerak di dalam zon yang berbeza, di mana majoriti, iaitu 37.2% (256), adalah berada di dalam Zon Tengah, diikuti oleh Zon Utara, iaitu 26.2% (180), Zon Pantai Timur, iaitu 19.6 % (135), dan Zon Selatan, iaitu 16.9% (116).

Jadual 1: Zon, Jantina dan Status Perkahwinan

| Profil | Kekerapan | Peratus |
|---------------------------|-----------|---------|
| Zon | | |
| Zon Utara | 180 | 26.2 |
| Zon Selatan | 116 | 16.9 |
| Zon Pantai Timur | 135 | 19.6 |
| Zon Tengah | 256 | 37.2 |
| Jantina | | |
| Lelaki | 207 | 30.1 |
| Perempuan | 481 | 69.9 |
| Status Perkahwinan | | |
| Berkahwin | 677 | 98.4 |
| Belum Berkahwin | 10 | 1.5 |
| Duda/Janda | 1 | .1 |

Dari sudut jantina pula menunjukkan majoriti, iaitu 69.9% (481), daripada responden adalah terdiri daripada pelajar perempuan manakala selebihnya, iaitu 30.1% (207), adalah terdiri daripada pelajar lelaki. Status perkahwinan responden pula menunjukkan hampir semua, iaitu 98.4% (677), daripada responden adalah terdiri daripada pelajar bujang, diikuti oleh pelajar berkahwin, iaitu 1.5% (10), dan pelajar janda, iaitu 0.1% (1).

Taburan mengikut anutan agama seperti dipaparkan dalam Jadual 2 menunjukkan hampir semua, iaitu 91.7% (631), daripada responden adalah terdiri daripada pelajar agama Islam, diikuti oleh pelajar agama Buddha, iaitu 6.1% (42), pelajar agama Hindu, iaitu 1.3% (9), pelajar agama Kristian, iaitu 0.7% (5), dan lain-lain, iaitu 0.1% (1).

Jadual 2: Taburan Mengikut Agama

| Profil | Kekerapan | Peratus |
|--------------|------------|------------|
| Agama | | |
| Islam | 631 | 91.7 |
| Buddha | 42 | 6.1 |
| Hindu | 9 | 1.3 |
| Kristian | 5 | .7 |
| Lain-lain | 1 | .1 |
| Total | 688 | 100 |

Jadual 3 menjelaskan taburan responden mengikut aliran persekolahan, kategori universiti, tahap pengajian dan pembiayaan pengajian. Taburan menunjukkan majoriti, iaitu 56.2% (387), daripada responden adalah terdiri daripada pelajar Sekolah Kebangsaan, diikuti oleh pelajar Sekolah Agama, iaitu 36.2% (249), pelajar Sekolah Jenis Kebangsaan, iaitu 4.9% (34), dan pelajar Sekolah Vokasional/Teknik, iaitu 2.6% (18).

Jadual 3: Aliran Persekolahan, Kategori Universiti, Tahap Pengajian dan Pembiayaan


| Profil | Kekerapan | Peratus |
|-----------------------------|------------------|----------------|
| Aliran Persekolahan | | |
| Kebangsaan | 387 | 56.2 |
| Jenis Kebangsaan | 34 | 4.9 |
| Vokasional/Teknik | 18 | 2.6 |
| Agama | 249 | 36.2 |
| Kategori Universiti | | |
| Awam | 478 | 69.5 |
| Swasta | 210 | 30.5 |
| Tahap Pengajian | | |
| Diploma | 191 | 27.8 |
| Ijazah | 475 | 69.0 |
| Sarjana | 20 | 2.9 |
| PhD | 2 | .3 |
| Pembiayaan Pengajian | | |
| PTPTN | 428 | 62.2 |
| Perbelanjaan Sendiri | 99 | 14.4 |
| Biasiswa | 161 | 23.4 |

Dari sudut kategori institusi pengajian tinggi (IPT) pula, pecahan responden menunjukkan majoriti, iaitu 69.5% (478), daripada responden adalah terdiri daripada pelajar Universiti Awam, diikuti oleh pelajar Universiti Swasta, iaitu 30.5% (210). Manakala, tahap pengajian responden menunjukkan majoriti daripada kalangan responden kajian, iaitu 69.0% (475), adalah terdiri daripada pelajar Ijazah, diikuti oleh pelajar Diploma, iaitu 27.8% (191), pelajar Sarjana, iaitu 2.9% (20), dan pelajar PhD, iaitu 0.3% (2). Sorotan dari sudut pembiayaan pengajian responden menunjukkan majoriti, iaitu 62.2% (428) daripada responden adalah terdiri daripada pelajar yang mendapat pembiayaan PTPTN, diikuti oleh pelajar yang mendapat pembiayaan Biasiswa, iaitu 23.4% (161), dan pelajar yang menggunakan Perbelanjaan Sendiri, iaitu 14.4% (99).


Tahap Kefahaman Pelajar terhadap ISIS

Secara keseluruhannya, tahap kefahaman pelajar IPT terhadap ISIS adalah agak rendah, khususnya apabila pertanyaan yang dikemukakan kepada mereka mengenai ISIS adalah pertanyaan yang spesifik seperti hubungan ISIS dengan al-Qaeda dan fahaman sebenar ISIS. Paling menonjol adalah apabila masih ramai dalam kalangan pelajar IPT gagal memahami bahawa ISIS adalah pertubuhan pengganas.

Graf 1 menjelaskan dapatan mengenai tahap pengetahuan tentang bentuk pertubuhan ISIS. Dapatan menunjukkan 38% (298) iaitu hampir separuh daripada responden, tidak memahami bentuk pertubuhan ISIS, iaitu, 14% (90) menyatakan ISIS adalah pertubuhan politik dan 22% (140) menyatakan ISIS adalah pertubuhan agama sedangkan ISIS sebenarnya adalah pertubuhan pengganas (62%).


Graf 1: Bentuk Pertubuhan ISIS

Graf 2 pula menjelaskan kefahaman tentang fahaman yang dianuti kumpulan ISIS. Sebanyak 60% responden memberi respon merujuk kumpulan ISIS kepada fahaman Syiah, Sunni (24%), Salafi (12%) dan Sufi (4%).

Graf 2: Bentuk Pertubuhan ISIS


Selain itu, Graf 3 pula menunjukkan 51% atau 330, iaitu hampir separuh daripada responden, tidak memahami perkaitan antara ISIS dengan Al-Qaeda dengan menyatakan ISIS dan Al-Qaeda tidak mempunyai hubungan sedangkan sebenarnya ISIS sebagai pertubuhan yang berasal dari al-Qaeda.

Graf 3: Kaitan ISIS dan al-Qaeda



Dari sudut penglibatan rakyat Malaysia terhadap ISIS, Graf 4 menunjukkan 67% (454), iaitu majoriti daripada responden, memahami penglibatan rakyat Malaysia dalam perjuangan ISIS dengan menyatakan rakyat Malaysia terlibat dalam perjuangan ISIS.

Graf 4: Penglibatan Rakyat Malaysia dalam ISIS



Dapatan mengenai tahap kefahaman responden terhadap ISIS menunjukkan majoriti tidak mempunyai kefahaman jelas tentang ISIS walaupun mempunyai tahap akses terhadap sumber maklumat yang baik melalui pelbagai sumber sama ada bercetak ataupun dalam talian.

Dapatan ini amat menarik untuk dianalisa dengan lebih mendalam kerana jika sokongan kepada ISIS adalah berpunca daripada kepercayaan tidak betul responden mengenai ISIS maka salah satu langkah utama yang perlu dilaksanakan oleh pihak kerajaan untuk membendung pengaruh ISIS adalah dengan memperbetulkan kepercayaan mereka mengenai ISIS. Selama mana rakyat Malaysia tidak meyakini bahawa ISIS adalah pertubuhan pengganas maka selagi itu pengaruh ISIS akan tetap wujud.

Potensi Penerimaan Pelajar IPT terhadap Perjuangan ISIS

Instrumen kajian untuk seksyen ini dibentuk untuk memahami potensi penerimaan dan para pelajar IPT terhadap ISIS serta faktor yang mempengaruhi tindakan tersebut.

Jadual 4: Keputusan Analisa Tahap Penerimaan Pelajar IPTA terhadap Ideologi ISIS

| | N | Purata | Std. Deviation | | Skewness | | Kurtosis | |
|--------------------------------------|-----------|-----------|----------------|-----------|-----------|------------|-----------|------------|
| | Statistic | Statistic | Std. Error | Statistic | Statistic | Std. Error | Statistic | Std. Error |
| Penerimaan Pelajar IPT Terhadap ISIS | 688 | 1.9233 | .02761 | .72412 | .735 | .093 | -.059 | .186 |

Jadual 4 di atas menjelaskan secara keseluruhannya tentang tahap penerimaan pelajar IPT terhadap ISIS. Dapatan memperlihatkan petunjuk positif bahawa tahap penerimaan pelajar IPT terhadap perjuangan ISIS adalah rendah, dengan min terkumpul sebanyak 1.92, dengan data bertaburan normal, dinilai dari segi skewness, 0.74 dan kurtosis -.059, iaitu kurang daripada 1/-1. Ini menunjukkan bahawa, secara keseluruhan, pelajar IPTA tidak dapat menerima ISIS sebagai satu pertubuhan yang perlu disokong. Jika dilihat secara mendalam, bagi setiap elemen, pecahan keputusan adalah seperti di bawah.

Jadual 5 pula menunjukkan secara lebih terperinci dapatan setiap item yang ditanya dalam soal selidik ini. Dari sudut kekerapan (frequency), dapatan menunjukkan responden secara majoriti tidak setuju menerima (54%) atau mengiktiraf balasan syurga untuk perjuangan ISIS (66.7%), menyumbang tenaga atau duit (54.8%), berdebat mempertahankan (63.7%), menderma untuk perjuangan ISIS (72.1%), mengajak rakan-rakan menyertai ISIS (80.9%), tidak menghubungi kenalan media sosial untuk mengajak menyertai ISIS (83.4%) atau membeli barangan berkaitan ISIS (81.2%).

Berbeza dengan peratusan majoriti yang tidak bersetuju, didapati sebahagian kecil responden memberi respons positif terhadap ISIS, antaranya: menghormati fahaman (15.1%) atau mengiktiraf balasan syurga untuk perjuangan ISIS (9.3%), menyumbang tenaga atau duit (19.5%), berdebat mempertahankan (6.8%), menderma untuk perjuangan ISIS (7.9%), mengajak rakan-rakan menyertai ISIS (4.8%), tidak menghubungi kenalan media sosial untuk mengajak menyertai ISIS (4.8%) atau membeli barangan berkaitan ISIS (4.2%). Responden selebihnya telah mengambil sikap berkecuali.

Dapatan ini amat menarik untuk dianalisa dengan lebih mendalam dan memerlukan pendekatan yang tuntas untuk mencari punca yang membawa kepada penerimaan sebahagian responden terhadap ISIS. Analisis yang lebih mendalam telah dilakukan terhadap beberapa faktor yang boleh mempengaruhi tahap penerimaan terhadap ISIS.

Jadual 5: Kekerapan dan Peratus Penerimaan Pelajar IPTA terhadap Ideologi ISIS berdasarkan Item Keseluruhan

| Item Kajian | PERATUSAN (KEKERAPAN/FREQUENCY) | | | | |
|--|---------------------------------|----------------|----------------|----------------|--------------|
| | S.T.S | T.S | T.P | S | S.S |
| Saya menghormati fahaman politik ISIS | 230 (33.4%) | 147 (21.4%) | 176 (25.6%) | 104 (15.1%) | 30 (4.4%) |
| Menyertai ISIS boleh mendapat balasan syurga | 351 (51.0%) | 108 (15.7%) | 160 (23.3%) | 30 (4.4%) | 34 (4.9%) |
| Saya sedia menyumbang wang ringgit | 230 (33.4%) | 147 (21.4%) | 176 (25.6%) | 104 (15.1%) | 30 (4.4%) |

| | | | | | |
|--|----------------|----------------|----------------|--------------|--------------|
| Saya sentiasa berdebat mempertahankan | 280 (40.7%) | 158 (23.0%) | 202 (29.4%) | 42 (6.1%) | 5 (0.7%) |
| Saya menderma untuk perjuangan ISIS | 352 (51.2%) | 144 (20.9%) | 136 (19.8%) | 44 (6.4%) | 10 (1.5%) |
| Saya mengajak rakan-rakan untuk menyokong | 433 (62.9%) | 124 (18.0%) | 98 (14.2%) | 25 (3.6%) | 8 (1.2%) |
| Saya menghubungi kenalan internet dan media sosial | 422 (61.3%) | 152 (22.1%) | 80 (11.6%) | 29 (4.2%) | 4 (0.6%) |
| Saya membeli barangan berkaitan ISIS | 386 (56.1%) | 173 (25.1%) | 100 (14.5%) | 25 (3.6%) | 4 (0.6%) |

Nota: S.T.S (Sangat Tidak Setuju), T.S (Tak Setuju), T.P (Tak Pasti), S (Setuju), S.S (sangat setuju)

PERBINCANGAN

Ancaman keganasan oleh kumpulan ISIS telah menjadi isu utama dalam negara dan global. Kajian mengenai penerimaan pelajar IPT terhadap ISIS adalah penting untuk diteliti kerana golongan belia adalah sasaran utama propaganda dan perang saraf untuk tujuan penyebaran pengaruh, fahaman dan keahlian. Perbincangan akan dilakukan berkisar sekitar objektif, dapatan, penerangan dan perbandingan dengan literatur sedia ada.

Dapatan kajian menunjukkan bahawa tahap kefahaman pelajar secara umumnya adalah rendah. Responden didapati gagal memberi jawapan yang tepat terhadap persoalan mengenai tahap kefahaman asas tentang kumpulan pengganas ISIS yang menjadi tumpuan penyelidikan ini. Walaupun majoriti mengakui bahawa ISIS adalah satu bentuk kumpulan pengganas dan wujud penglibatan rakyat Malaysia dalam pergerakan kumpulan tersebut, tetapi mereka masih kurang memahami isu yang lebih mendalam, seperti kaitan ISIS dengan pertubuhan al-Qaeda. Jawapan terhadap soalan mengenai aliran fahaman ISIS yang majoriti merujuk kepada Syiah, diandaikan adalah lebih didorong oleh faktor sentimen, berbanding pengetahuan mereka yang sebenar. Tahap pengetahuan dan pemahaman yang rendah dalam kalangan responden kajian memberi petunjuk bahawa walaupun tahap akses terhadap sumber maklumat dan internet yang tinggi dan baik adalah tidak menjamin para pelajar akan memanfaatkan sepenuhnya kemudahan tersebut untuk mendalami isu sekeliling dan luar negara. Kekurangan pemahaman dan pengetahuan mengenai isu secara tepat boleh mendedahkan generasi belia terhadap anasir subversif yang cuba mempengaruhi pemikiran mereka.

Dalam konteks penyelidikan ini, secara khusus ia merujuk kepada ancaman perang saraf dan propaganda ISIS yang dilakukan secara umumnya melalui saluran media sosial yang menjadi tumpuan golongan belia masa kini. Malangnya, keadaan ini berlaku di sebalik peranan media tempatan dan antarabangsa memberi liputan meluas terhadap ancaman ISIS. Dapatan ini adalah selari dengan kajian lalu mengenai persepsi terhadap ancaman pengganas oleh Bakri dan Ratnaria (2007). Tahap pengetahuan yang rendah ini boleh dikaitkan dengan faktor sumber ancaman yang bukan bersifat domestik. Fokus responden adalah terarah kepada ancaman yang bersifat segera (*immediate*) yakni persekitaran di mana mereka berada. Ancaman ISIS tidak dilihat sebagai keutamaan kerana Malaysia secara umumnya dianggap selamat, dan ancaman ISIS pada dasarnya bukan berpunca daripada sumber domestik, tetapi berpusat di Timur Tengah. Kajian oleh Huddy, Feldman, Taber dan Lahav (2005) juga turut mengaitkan faktor psikologi di mana individu akan memberi keutamaan kepada '*immediate threat*' berbanding dengan ancaman lain yang wujud walaupun ancaman tersebut juga dianggap penting. Dapatan ini amat menarik untuk dianalisa dengan lebih mendalam kerana jika sokongan kepada ISIS adalah berpunca daripada kepercayaan tidak betul atau songsang responden mengenai ISIS maka salah satu langkah utama yang perlu dilaksanakan oleh pihak kerajaan untuk membendung pengaruh ISIS dalam kalangan rakyat Malaysia adalah memberikan kefahaman kepada mereka mengenai ISIS

dan bahaya ideologi ekstrem Salafi yang mereka bawa. Selama mana rakyat Malaysia tidak meyakini bahawa ISIS adalah pertubuhan pengganas maka selagi itu pengaruh ISIS akan tetap wujud.

Tahap penerimaan pelajar IPT terhadap perjuangan ISIS juga adalah rendah dengan min terkumpul kurang daripada 2.00 dan nilai purata min yang konsisten di bawah 3.00 untuk setiap item yang dikaji. Fenomena ini menunjukkan tahap kesedaran yang baik dalam kalangan responden pelajar IPT yang dikaji. Ia adalah satu petunjuk yang baik dari aspek keselamatan negara. Ia juga bermaksud, walaupun pelajar IPT sebagai generasi yang terdedah kepada pelbagai sumber maklumat disebabkan faktor tahap akses yang tinggi terhadap internet, potensi penerimaan yang negatif menunjukkan bahawa majoriti pelajar adalah tidak terpengaruh kepada anasir subversif. Kajian ini pada asasnya juga menepati kajian lalu tentang persepsi terhadap ancaman seperti dilakukan oleh Bakri dan Ratnaria (2007) dan Jacobson (1991) yang menunjukkan bahawa pembentukan persepsi ancaman (*threat perception*) adalah berkait rapat dengan kejadian-kejadian yang dianggap sebagai penunjuk aras kepada ancaman. Dalam hal ini, tindak tanduk ISIS seperti yang dipaparkan melalui media massa dilihat sebagai satu bentuk ancaman kepada keselamatan.

Walaupun bagaimanapun, kajian menunjukkan bahawa masih terdapat sejumlah kecil responden (pada kadar 5-15%) yang menerima, masih tidak pasti, bersedia menyokong perjuangan ISIS atau tidak menolak perjuangan kumpulan ISIS. Ini bermaksud pihak berwajib harus mencari jalan mengenal pasti golongan sasaran dan mendekati golongan ini secara langsung untuk memahami dan menangani permasalahan yang wujud. Walaupun bilangan mereka kecil, tetapi angka tersebut adalah signifikan kerana kumpulan pengganas radikal kebiasaannya beroperasi pada skala keanggotaan yang kecil selari dengan konsep peperangan tidak regular (*irregular warfare*). Hasil kajian ini amat menarik untuk dianalisa dengan lebih mendalam dan memerlukan pendekatan yang tuntas untuk mencari jalan penyelesaian yang baik kerana tindak balas positif responden memberi persepsi negatif bahawa mereka mungkin boleh dipengaruhi ISIS, atau telah terpengaruh dengan propaganda ISIS secara langsung atau tidak langsung.

Oleh itu, satu strategi anti radikalisme dan anti keganasan harus dilaksanakan oleh agensi keselamatan negara khususnya yang melibatkan perkongsian maklumat risikan dan aktiviti ketenteraan antara Malaysia dan negara-negara lain khususnya ASEAN. Secara umumnya, di Malaysia beberapa langkah boleh dilakukan untuk menangani ancaman ISIS ini. Pertama, aktiviti pengambilan ahli baru ISIS dalam kalangan belia harus dipantau dan disekat. ISIS dilihat cuba menarik belia Malaysia khususnya yang menghadapi masalah kehidupan, masalah sosial dan masalah pemahaman agama untuk dikuasai minda mereka bagi menyertai ISIS. Malah ada kes yang menunjukkan bahawa golongan belia Malaysia yang tertarik dengan ISIS adalah kerana menyertai jihad merupakan cara mudah menyucikan diri dari dosa yang dilakukan sebelumnya. Oleh itu, Kementerian Belia dan Sukan juga harus berstrategi untuk berhadapan dengan belia dengan melakukan kempen untuk belia menjauhi aktiviti ISIS.

Seterusnya, pelbagai pihak di dalam negara harus berhadapan dengan ideologi ISIS yang boleh menggugat keharmonian masyarakat Malaysia. ISIS dilihat menganuti fahaman atau ideologi Jihadi Salafi atau Salafisme. Fahaman ini harus dibanteras melalui kaedah ilmiah kerana mereka berhujah akan keperluan menyertai jihad bersama ISIS melalui manipulasi ke atas al-Quran dan Hadis. Oleh itu, pihak yang harus bertanggungjawab berhadapan dengan hujah Jihadi Salafi ini harus datang daripada Jabatan Kemajuan Islam Malaysia (JAKIM), majlis dan jabatan agama negeri. Seharusnya JAKIM mempunyai jentera gerak saraf yang berhadapan dengan pihak ISIS melalui hujah al-Quran dan Hadis sebenar. Perisytiharan fatwa pengharaman ISIS dan aktiviti mereka tidak cukup. Perdebatan idea harus dilakukan supaya rakyat Malaysia faham akan perkara sebenar.

Akhir sekali, kawalan media sosial juga harus dilakukan. Ternyata bahawa ISIS mendapat sokongan dan simpati ke atas perjuangan mereka daripada golongan belia yang melayari media sosial. Malah ISIS berjaya merekrut ahli baru dan sumber kewangan daripada warga media sosial yang bersimpati dengan

perjuangan ISIS. Oleh itu, pemantauan juga harus dilakukan oleh pihak Polis, Suruhanjaya Komunikasi dan Multimedia dan agensi *Cyber Security Malaysia* bagi membendung penularan propaganda ISIS. Malah pihak JAKIM juga boleh mewujudkan tentera siber mereka untuk berhadapan dengan idea dan hujah jihadi salafi ini.

KESIMPULAN

Pada bulan November 2016 yang lalu, berlakunya serangan rambang di Paris, Perancis yang membunuh lebih 140 orang oleh pejuang kumpulan pengganas Negara Islam untuk Iraq dan Syria (ISIS). Malah pejuang ISIS juga telah mengaku bertanggungjawab mengebom pesawat Rusia yang meletup di udara Semenanjung Sinai, Mesir. Insiden tebusan di Mali juga dikatakan melibatkan pejuang ISIS (Mohd Azizuddin, 2015). Kekerapan berlakunya insiden keganasan kini memperlihatkan strategi ISIS untuk memperluaskan konflik di Syria dan Iraq dan ke seluruh dunia. Ini kerana negara-negara sekutu Amerika Syarikat (AS) dan Rusia mula melancarkan serangan udara bertali arus ke wilayah yang dikuasai ISIS. Untuk mengalihkan tumpuan kuasa besar ini daripada serangan di Iraq dan Syria, mereka mula menyerang masyarakat di Eropah dan Afrika bagi menakut-nakutkan rakyat negara terbabit lantas mengalihkan tumpuan ketenteraan Barat khususnya ke atas keselamatan domestik berbanding terlibat dengan serangan di Asia Barat.

Ancaman yang hebat dari ISIS kini telah menyebabkan Presiden AS Barack Obama ketika menghadiri Sidang Kemuncak ASEAN Ke-27 pada 18-22 November 2015 ini menjelaskan bahawa tumpuan utama sidang kali ini adalah membincangkan cara terbaik menghadapi ancaman ISIS selain isu utama lain seperti krisis di Laut China Selatan. Ketika sidang ASEAN ini, pihak keselamatan Malaysia telah mengerahkan seramai 4,500 tentera dan ribuan polis untuk mengawal keselamatan sepanjang sidang ASEAN ini berlangsung dengan kehadiran 18 pemimpin utama dunia di Kuala Lumpur (Mohd Azizuddin, 2015).

Secara umumnya, ancaman ISIS ini telah menjadi ancaman mendesak bagi Malaysia untuk menangannya secara bijaksana. Setakat ini pihak keselamatan Malaysia dilihat dapat membendung ancaman ISIS ini kerana warga Malaysia yang terlibat kini kebanyakannya adalah anggota veteran pejuang salafi yang sebelum ini pernah juga terlibat dengan al-Qaeda dan Jemaah Islamiyah. Namun, proses pembanterasannya radikalisme dan keganasan harus diteruskan bagi memastikan Malaysia terus kekal aman dan makmur.

RUJUKAN

- Ayub Khan Mydin Pitchay, Datuk. 2015, 28 September. Temubual (Lokasi: Ibu Pejabat Polis Bukit Aman)
- Azeem, I. 2014. The resurgence of al-Qaeda in Syria and Iraq. Atas talian, akses: 15 Mac 2015, <http://www.strategicstudiesinstitute.army.mil/pdffiles/PUB1210.pdf>
- Azrai Mohammad. 5 Mac 2015. Dua militan IS Malaysia rakan video sembelih. Utusan Online. Diperolehi dari <http://www.utusan.com.my>
- Babbie, E. 2001. The practice of social research. 9th Ed., Belmont Ca: Wadsworth Publishing.
- Bakri Mat & Ratnaria Wahid. 2007. Ancaman pengganas dan keselamatan negara selepas peristiwa 11 September 2001. Laporan Penyelidikan (Geran Fakulti). Universiti Utara Malaysia
- Barrett, R. 2014. The Islamic State. Atas talian, akses: 19 Mac 2015, <http://soufangroup.com/wp-content/uploads/2014/10/TSG-The-Islamic-State-Nov14.pdf>
- Elliot, F. 2014. Special report, the Islamic State. Atas talian, akses: 22 Mac 2014, <http://www.clarionproject.org/sites/default/files/islamic-state-isis-isil-factsheet-1.pdf>
- Farik Zolkepli. 8 Disember 2014. Cops identify second Malaysian suicide bomber killed in Syria. The Star Online. Diperolehi dari <http://www.thestar.com.my>
- Huddy, L., Feldman, S., Taber, C. & Lahav, G. 2005. Threat, anxiety, and support of antiterrorism policies. *American Journal of Political Science*, 49(3), 593-608.
- Jabatan Perdana Menteri. 2015. Kerta Putih 'Ke arah menangani ancaman kumpulan Islamic State', Kementerian Dalam Negeri Malaysia, Atas talian, http://www.pmo.gov.my/home.php?menu=speech&page=1676&news_id=745&speech_cat=2
- Jacobson, D. 1991. Toward a theoretical distinction between the stress components of the job insecurity and job loss experiences, *Research in the Sociology of Organizations*, 9, 1-19.
- Kenneth, K., Christopher, M.B., Carla, E.H., Rhoda, M. & Matthew, C.W. 2015. The "Islamic State" crisis and U.S. Policy. Atas talian, akses: 20 Mac 2015, <https://fas.org/sgp/crs/mideast/R43612.pdf>
- Malaysian militants in Syria and Iraq are ISIS supporters, police say. 5 Mac 2016. The Malay Mail. Diperolehi dari <http://www.themalaymailonline.com>
- Mohd Azizuddin Mohd Sani. 2015. Malaysia perlu tangani ancaman IS secara bijaksana. *Berita Harian*, 24 Nov 2015, hlm. 30.
- Muhammad Afham Ramli. 23 Julai 2016. KPN sahkan serangan bom di Puchong didalangi IS. *Sinar Harian Online*. Diperolehi dari <http://www.sinarharian.com.my>.
- Organization of Islamic Cooperation (OIC). 2014. Islamic State of Iraq and the Levant (ISIL). 36th Annual Conference of Organization of Islamic Cooperation (OIC). Atas talian, akses: 12 Februari 2015, http://www3.canisius.edu/~diccioj/MUN_2014_OIC_ISIL.pdf

Patrick, B.J. 2014. Countering ISIL's financing. Atas talian, akses: 19 Mac 2015, http://www.rand.org/content/dam/rand/pubs/testimonies/CT400/CT419/RAND_CT419.pdf

Pengebom berani mati rakyat Malaysia. Utusan Malaysia. 9 Disember 2014. Utusan Malaysia. Diperolehi dari <http://www.utusan.com.my>

Sageman, M. 2004. Understanding terror networks. Philadelphia: University of Pennsylvania Press.

Silber, M. D., and A. Bhatt. 2007. Radicalisation in the West: The homegrown threat. New York: The New York City Police Department

Zharif Badrul. 13 Januari 2015. Perangkap IS melalui media sosial. Utusan Malaysia Online. Diperolehi dari <http://www.utusan.com.my>

Zikmund, W.G. 2003. Business research methods. 7th Edition. Ohio: Thomson.